

欽定全唐文

欽定全唐文卷三百十一 目錄

新文藝出版社藏書

孫逖

四

冊頴王獨孤妃文

冊信成公主文

冊昌樂公主文

冊高都公主文

冊永寧公主文

爲宰相賀雪表

爲宰相賀雨表

爲宰相賀雨表

爲宰相賀平原郡鑄尊容鑪上有紫雲等瑞表  
爲宰相賀開元觀鑄聖容慶雲見表

爲宰相賀會昌山慶雲見表

爲宰相賀賽龍潭有瑞雲表

爲宰相賀中嶽合煉藥自成兼有瑞雲見表

爲宰相賀太原府聖容樣至有慶雲見表

爲宰相賀李樹凌冬結實表

爲宰相賀合鍊院產芝草表

爲宰相賀武威郡石化爲麪表

爲宰相賀檀州界破奚賊表

爲宰相賀破吐蕃並慶雲見表

爲宰相賀九姓斬送突厥首表

爲宰相賀突厥來降表

爲宰相賀隴右破吐蕃表

爲宰相賀趙郡鑄天尊及佛有諸瑞表

爲宰相賀開元寺釋迦牟尼佛白光等瑞表

爲宰相賀宮人夢元元皇帝應見表

爲宰相謝至尊爲蒼生祈福表

爲李右相謝上上考表

爲宰相謝賜竹扇表

爲宰相謝賜果實等表

爲宰相謝賜永穆公主池亭遊宴表

爲宰相請不停千秋宴會表

陳情表

應賢良方正科對策

并問

對讀書判

對除喪鼓琴判

欽定全唐文卷三百十一

孫逖

四

冊頴王獨孤妃文

維開元二十五年歲次丁丑七月辛巳朔十日辛卯皇帝  
若曰於戲樹之外屏義在於展親修其內則禮先於擇配  
咨爾故右驍衛郎將獨孤禮第十二女軒冕之族通姻自  
久賢明之行淑問攸歸早習組紃之功備詳圖史之學實  
資女士以儻藩維今遣使工部尚書同中書門下三品牛  
仙客副使行黃門侍郎陳希烈持節冊爾爲頴王妃爾其

克慎威儀無忘孝教欽承國命永茂嬪風可不慎歟

冊信成公主文

維開元二十五年歲次丁丑八月癸卯朔十五日丁巳皇帝若曰於戲易著于歸詩稱下嫁所以正風化厚人倫也咨爾信成公主淑慎由衷聰明形外訓以師氏頗詳環佩之儀修其婦功更習絳綻之藝日徵先近年及有行宜錫徽章俾膺茂典今遣使金紫光祿大夫兵部尚書兼中書令集賢院學士修國史上柱國晉國公李林甫副使中大夫守中書侍郎集賢院學士徐安貞持節冊爾爲信成公

主爾其光昭閭德宏長國風無怠厥心永綏介福可不慎與

冊昌樂公主文

維開元二十五年歲次丁丑八月癸卯朔二十九日辛未皇帝若曰於戲好合之禮以正人倫肅雍之德用成婦道咨爾昌樂公主生知法度性與柔和亟聞彤史之言頗識采蘋之事素以爲絢旣閑於內則梅有其實式遵於下嫁宜膺冊書之命以備車服之庸今遣使銀青光祿大夫工部尚書牛仙客副使黃門侍郎陳希烈持節冊爾爲昌樂

公主爾其欽崇四教承順六姻式是大邦受茲明命可不慎歟

冊高都公主文

維開元二十五年歲次丁丑九月壬申朔十一日壬午皇帝若曰於戲古之聖人垂訓作則必正內外之位以明婚姻之禮咨爾高都公主生於公宮自稟幽閒之性教以師氏更彰徽柔之則能循法度克慎言容魯館于歸沁園將啟宦膺冊命俾協典章今遣使工部尚書牛仙客副使黃門侍郎陳希烈持節冊爾爲高都公主爾其自下於心增

修厥德式瞻清懿永固恩榮可不慎歟

冊永寧公主文

維開元二十六年歲次戊寅八月丁酉朔二十二日戊午  
皇帝若曰於戲人倫式敘以正國風女子有行將成婦道  
咨爾永寧公主自幼及長終溫且惠引圖史爲鏡鑑用柔  
和爲粉澤許嫁而笄旣遵於彝典備物之冊宜承於寵命  
今遣使金紫光祿大夫兵部尚書兼中書令李林甫副使  
上柱國徐安貞持節冊爾爲永寧公主爾其謙恭自下淑  
慎爲先無忝公宮之教永貽邦媛之則可不慎歟

金文全集卷二  
三十一  
三

爲宰相賀雪表

臣某言臣伏見自冬已來雨潤微少雖春候尚遠未足爲災而聖慮憂勤恐妨農事靈星允答瑞雪其滂自昏達明已覩於盈尺無遠不及何止於千里旣溥旣霈足表西成之徵不疾不徐正符東作之候豈伊利澤更是殊祥臣等微生叨荷榮渥幸覩休慶空知抃舞無任欣躍之至謹奉表陳賀以聞

爲宰相賀雨表

臣等今日見高力士伏承陛下以春雨颸憊皇慈軫念特

紓鳳輦俯詣龍池祝之以聖言詰之以神理靈星允答膏澤遂盈速若影響合如符契則知聰明之德與乾道而潛通變化之功隨聖情而廣運殊祥昭著不應難名在於微臣倍深慶悅伏望宣付國史以揚天休無任抃躍之至謹奉表陳賀以聞

爲宰相賀雨表

臣某言臣等伏見近者微旱聖情勤勞躬徇物情修禱祀於神明焦思憂人罷歡宴於良節精誠懇至上應元通果叶休徵遂成膏雨植物皆潤已霑霖霖之恩陰雲尚多終

致滂沱之澤三農有慶萬國同歡臣等職在燮和効無涓滴久勞聖慮責且重於邱山幸遇甘霖恩實濃於卉木無任欣慶之至謹奉表陳賀以聞

爲宰相賀平原郡鑄尊容爐上有紫雲等瑞表

臣等伏見平原郡奏去月七日鑄尊容爐上有紫雲如蓋高三尺餘鑄畢方散烟焰中又依稀有一老人鬚眉皓白俯臨鑄上並繞鑪行道時聞空中傳億萬聲及鑄畢啟模相好圓滿面有自然之金色者聖心通感至道炳靈洪鑪未開殊祥累見蓋呈祥瑞相表異金光烈火之中式瞻仙

老無聲之地忽聽神言在前古而未聞不崇朝而薦至稠  
疊之慶名言所難況肇自京師至於郡國眞容所鑄靈應  
必臻神妙無方用彰於聖壽生靈何幸永覩於昌期臣等  
忝居近侍倍加欣慶無任抃躍之至謹奉表陳賀以聞

爲宰相賀開元觀鑄聖容慶雲見表

臣等伏見開元觀先請今月十八日鑄聖容昨夜先期普  
天降雨遲明展事萬里無雲及寫之際又有卿雲休氣氤  
氳扶日道俗咸覩移時不散伏以聖惟不測有感而必通  
天則無言觸類而成應陛下欽崇至道子育蒼生爰寫尊

金匱全集卷之三十一  
容將洪介福故得天地合氣神靈布和甘澤而達曙已晴  
彩雲而抱日呈瑞鎔範之際殊祥畢集實表聖明之感更  
彰仁壽之期臣等忝在掖垣不勝大慶無任悅豫之至

爲宰相賀會昌山慶雲見表

臣某言臣等今日仗退後伏見會昌山上有五色雲見紅  
翠稠疊光彩相鮮爛若藻繪積如山岳近依湯井俯俛寢  
居移時不散從臣咸覩伏以雲物變態真仙所憑法駕纔  
上祥光已見豈惟天地合氣以表於和平固以神靈告休  
用彰於聖壽無任抃躍之至謹奉衷稱賀以聞

爲宰相賀賽龍潭有瑞雲表

臣某言適內謁者監牛仙童至奉宣進止先爲蒼生祈雨  
今日告賽不坐明日齊修不坐者涼秋已來時雨未降陛下憂勤兆庶躬自祈禱甘澤溥洽又陳昭報親紓鳳輦俯  
詣龍堂御膳撤鮮齋宮致潔亦旣累日方申大祭禮畢之後更祝龍潭纔發德音已臻丕應仙童云其時卽有青紫  
雲自潭而起爛熳呈祥烟燼布和勢騰晴空光映秋水卽知飛龍之德變化無方聖人之感深微莫測惟茲靈貺實謂殊常臣等特賀恩榮倍增欣慶伏望宣示朝列兼付史

官用垂明徵永昭盛德無任慶忭之至謹奉表陳賀以聞  
爲宰相賀中嶽合煉藥自成兼有瑞雲見表

臣某言臣等伏見道士孫太沖奏事奉進止令中使薛履  
信監臣於中嶽嵩陽觀合煉其竈中著水置炭於竈側對  
三却迴已經數月泥拭旣密緘封並全卽與縣官等對開  
門其炭並盡灰又別聚不動人力其藥已成初乃五色發  
瑞終則太陽暉於爐際又河南裴敦復所奏並奉敕令右  
補闕李成式往驗並同者臣聞神變無方式昭於幽贊聖  
心有感必驗於元通陛下至德奉天精誠契道動無不應

事若合符故得煉藥之所瑞雲先見丹爐不爇金液自成  
太陽降精宦假於人工飛廉扇炭諒關於神力殊祥特異  
曠古未聞靈跡既彰用資於聖壽羣生何幸永覩於昌期  
況在微臣實倍常品無任抃躍之至謹奉表陳賀以聞

爲宰相賀太原府聖容樣至有慶雲見表

臣等伏見太原尹常濟奉今月四日紫極宮玉石聖容樣  
至北京其時有慶雲垂天自辰至巳輪囷紛郁萬姓咸觀  
者伏以靈物呈瑞神仙效靈豈伊天地之和更是壽昌之  
慶況太原舊國王業所興聖容纔及於近郊卿靄已彰於

合契氤氳五色變汾水之白雲隱映三清類函關之紫氣  
上元感通品物同歡況在微臣倍深慶悅無任抃躍之至

爲宰相賀李樹凌冬結實表

臣等伏見劉麟奏南郡李樹凌冬結實並圖及李實者惟  
此珍樹名應皇族元元所指用興長發之祥明靈是憑故  
衷非常之瑞已經夏實更發冬榮霜雪而翠葉不彫斯須  
而朱實皆就仁及草木旣叶太平之期道貴生成仍呈久  
視之應恭惟聖感詎可名言所以彰寶祚之靈長表天枝  
之碩茂遠踰海嶠來薦闕庭豈三秀之足稱何兩歧之敢

喻殊祥薦至品物同歡況在臣等豈勝抃躍無任欣慶之至謹奉表陳賀以聞

爲宰相賀合鍊院產芝草表

臣等伏見道士黃河清等奏興慶宮合鍊院內產芝草五色分輝六莖闕二字神丹入鍊而轉精禎祥應期以如答覩

茲嘉瑞望宣付史官者伏以靈芝所致和氣之精著美仙經標名瑞典陛下深仁契道至德通神鍊液飛丹旣啟長年之館敷華有葉遽呈三秀之祥五色有類於卿雲六莖且符於帝樂豈惟動植昭感以表於休徵固亦眞仙叶應

用彰於聖壽臣等忝侍軒陛倍深慶悅無任抃躍之至謹  
奉表陳賀以聞

爲宰相賀武威郡石化爲麪表

臣等伏見王倕奏武威郡番禾縣嘉瑞鄉天寶山周回五  
六里石化爲麪在近村閭及諸郡部落自今載正月以來  
取食甘美益人又按圖經貞觀九年鳳凰集於此故名嘉  
瑞鄉其天寶山在此鄉界伏以神道設教變化無方聖人  
爲心感通必應陛下仁霑動植澤及生靈故得地不藏寶  
石變爲麪旣資人食又濟邊廩成熟自因於道氣艱難不

待於農功豈來麌之足方何雨粟之能喻況山符聖號用  
彰於萬壽鄉表瑞石允迪於前烈殊祥叶應景福攸臻臣  
等忝侍軒墀倍深慶悅無任抃躍之至謹奉表陳賀以聞

爲宰相賀檀州界破奚賊表

臣等今月二十五日於易州所奏事陛下顧謂臣曰朝夕  
之間諸軍當有捷書至臣等愚淺莫測天心不逾數日張  
守珪果奏副將安祿山於檀州界破奚賊擒生斬級並獲  
馬牛計至數千定期不差於晷刻指事有同於符契聖惟  
廣運神以知來微妙之言自成於繫象元通之術不假於

著龜精義難名前古未有臣等何幸親覩明徵驚喜之誠  
抃躍交集伏望宣示朝列兼付史官式昭德音永用垂範  
無任喜慶之至謹奉表陳賀以聞

爲宰相賀破吐蕃並慶雲見表

臣等比見吐蕃舉國徵兵向二十萬掘壕置柵攻逼定戎  
城頃因奏事陛下謂臣等曰吐蕃雖眾當卽破亡計日之  
間捷書必至昨見皇甫惟明奏破定戎城下吐蕃賊二十  
萬眾並斬獲大將論莽布支頭隨狀奉進又初與賊相遇  
西風甚急及交鋒之後便至風迴旣掃妖氛兼有慶雲見

者臣聞天之討罪俟盈貫而方誅聖無不通匪常情之所及伏以西戎凶醜久負恩信敢踰絕漠來犯邊城舉國興師二十餘萬經時固守八十餘日蟻聚蛇伏狼顧鴟張據便地之井泉逼懸車之塹壘雖逆順曲直本無敵於王師而眾寡安危難預卜於人事自朝及野能不憂虞陛下神算無方睿謀先覺料此狂寇必合敗亡決祕策於禁中落奇兵於天上應期撲滅萬里廓清天聲所振已讐於四海虜將之首又懸於北闕事均符契理絕名言況合戰之時則返風破敵決勝之後則卿雲藹空大塊資其殺氣輪囷

表其休色實惟聖感詎測神功凡在庶寮不勝忭躍況於臣等倍萬恆品無任慶快之至謹奉表陳賀以聞

爲宰相賀九姓斬送突厥首表

臣等伏見王忠嗣奏九姓拔悉密等斬突厥可汗首送至朔方軍者伏以北虜孔熾其來自久憑險恃遠干紀亂常雖聖德撫和約爲父子之國而野心凶獁不改豺狼之性既盈稔貫自速天誅頃歲已來頻貽喪敗酋豪向化雖已歸降默啜迷恩尚爲潛竄苟合餘燼偷安絕漠陛下聖慮先覺神謀獨斷使其種類自至攜離咸革面於塞垣遂傳

首於軍壘以狄攻狄寧勞六月之師有征無戰豈待三年  
之克永罷邊柝遂清虜庭斬蚩尤而莫儔戮防風而何有  
豈惟率土無外用表於昌期固亦先天不違更彰於睿算  
凡曰士庶不勝慶悅況在臣等倍百恆情無任抃躍之至  
謹奉表陳賀以聞

爲宰相賀突厥來降表

臣等伏以突厥患邊其來自久頃雖朝廷示信約爲父子  
之國然而戎狄無親常畜豺狼之志陛下聖謀廣運睿略  
元通至道昭感神明叶贊不勞一卒不頓一兵使其種落

自相攜貳今葉護敗亡殞身漠北妻子繩繫爲俘闕下巢  
傾席卷瓦解雲散萬里無事二庭遂空曠古不賓盡爲臣  
僕普天所覆皆入封疆諒由負德背恩自速天亡之禍固  
亦休兵偃甲用彰海宴之期實有無方之神寧惟不戰之  
勝求諸載籍所未嘗聞臣等幸遇昌期欣逢大慶忝居近  
密實倍恆情無任抃躍之至謹奉表陳賀以聞仍望宣付  
史官兼示中外

爲宰相賀隴右破吐蕃表

臣等先在城中因奏事陛下謂臣等曰朕料至重陽已來

諸軍必頻剋捷臣等欽承聖旨詎測神功近者隴右果奏  
斬獲莽布支並生擒蘇毗王及鑾駕將迴劍南節度使章  
仇兼瓊又奏西山將士分爲五道破吐蕃城堡鎮柵等四  
十餘所四鎮節度馬靈察又奏破吐蕃不可勝數並聞護  
密識匿等數國共爲邊捍者數旬之間三方告捷應如影  
響合若符契禁暴如武盡決於宸衷知來似神更超於繫  
衷斬級獲醜陷陣毀城分南方之五將舉無遺策道西城  
之諸蕃仍爲外蔽百戰百勝以夷攻夷高居九重懸料萬  
里所以彰睿略之天贊知犬戎之日蹙臣等忝陪巡幸預

奉德音踴躍之誠實倍恆品無任欣慶之至謹奉表陳賀  
以聞

爲宰相賀趙郡鑄天尊及佛有諸瑞表

臣等伏見趙郡奏鑄等身元始天尊其日天氣晴和祥雲  
散彩又開模未畢先出白光尊容漸見毫光圓滿其花冠  
耀白色如玉遍身衣被自然雲霞着上有兩點白光流轉  
照耀又鑄等身釋迦牟尼佛螺髻兼遍身自然王色唯頂  
至面爲紫金色聖情敦道天心護法爰降宸儀將崇寶相  
鑄寫之際禎祥屢臻初發止於上京遂呈祥於外郡金姿

玉色不假琢磨霞帔霓裳非因藻繪見祥光於睂宇生瑞氣於雲端曲示明徵宛如合契元貺稠疊用彰萬億之期蒼生何幸盡登仁壽之域臣等忝奉軒墀倍深欣慶無任抃躍之至謹奉表陳賀以聞仍望宣示朝廷編諸簡冊

爲宰相賀開元寺釋迦牟尼佛白光等瑞表

臣等伏見開元寺所鑄釋迦牟尼佛身現金色頂含白光發濃紫於聖容散純黃於佛體未加瑩飾已成相好殊祥異應昔所未聞伏以聖人爲心元妙莫測至誠所感靈變無方陛下子育羣生宏修正教寫真容於法界傳寶相於

恒沙洎崇建以來禎祥畢集自有神通之助豈資人妙之功超絕瑞於千古表昌期於萬邦凡曰士庶不勝慶幸況於臣等倍切常情無任抃悅之至謹奉表陳賀以聞

爲宰相賀宮人夢元元皇帝應見表

臣等昨因奏事親承德音宮中有一婦人性頗好道然未全通悟數日以前忽夢元元皇帝慇懃教誡道法尚未盡解遵承無何又依前夢見大被呵責遂以水噀其兩目因而喪明比夢覺後都無所見然始責躬罪已精祈至真又夢元元皇帝教之曰汝可見吾孫自當立愈其婦人曰不

知孫是何人曰汝皇帝是也汝至酉時可見當施其法使汝知驗至時宮中數人共扶見朕朕爲潔誠作道法使救療其目須臾自開平復如舊聖祖靈感昭然合符與卿等同慶者伏以混成莫測元元闡其教眾妙難名陛下光其業二聖表德千古叶符將告天休遂憑宮女乘恍惚而爲夢在希微而有聲不因其言孰報貽孫之慶不開其目何彰救物之慈法事旣陳靈徵果驗能使病者復歸其明當聖躬本命之時合烈祖元通之契事且符於久視理仍叶於常存殊尤之祥載籍未有臣忝跡樞近親奉德音慶悅

之情實倍恆品無任朴躍之至謹奉表陳賀以聞

爲宰相謝至尊爲蒼生祈福表

臣等伏見太常寺太祝王璵奏陛下自臨御以來未嘗不四更已後夙興盥漱爲蒼生祈福每遣公卿方士巡察川岳祝文虔誠御札親署曾無一字自爲聖躬伏請自今以後聖心徇物俯垂矜允下情獲展品物同歡伏以虞后濬明但聞恭已周王旰食亦謂憂人未有精意妙門勤祈道寶勞聖躬於夙夜移景福於蒼生遂以爲常久而無倦肇自開闢未嘗覩聞雖覆燾之恩豈求報於芻狗而生成之

類願效祝於封人天聽不違民心載悅況在臣等特荷殊  
私莫測神功空慙帝力無任忻慶之至謹奉表陳謝以聞

爲李右相謝上上考表

臣今日伏奉恩旨垂賜上上考並辭捧讀兢惶戰汗交集  
臣謬以庸薄久塵樞近承奉明命述宣聖謨罪戾猶多涓  
埃何補豈悟天心善誘宸眷殊常垂翦拂於德音踰涯越  
分降恩私於考績超等邁倫雖承含垢之慈終多覆餗之  
懼無任慙悚之至

爲宰相謝賜竹扇表

高力士至奉宣恩制各賜臣等竹扇及聖贊齧以器用俯  
矜於煩暑博以文章更垂於光拂殊私備及自昔未聞臣  
等輕生謬膺大任雖罄心効節徒有慕於修篁而淺識薄  
材何足當於睿藻外榮天錫內愧御題善誘之恩則深負  
乘之責彌懼何以對越休命奉揚元風捧對兢惶罔知攸  
措不勝感戴之至謹奉表陳謝以聞

爲宰相謝賜果實等表

臣等今日頻承賜賚累降珍鮮飽德空淡荷恩無力伏以  
甘果之實今則非時寧惟自遠而來固亦以少爲貴當供

御膳以備天廚何幸小人之腹忽辱非常之賜未施塵露  
空忝稻梁悚戴慙惶罔知攸措謹奉表陳謝以聞

爲宰相謝賜永穆公主池亭遊宴表

臣某言內使趙侃奉宣恩旨賜臣等明日於永穆公主池  
亭遊宴者謬承天澤頻賜春遊小人之腹每辱於珍膳下  
里之聽屢聞於仙樂殊私薦及榮施難酬雖朝野多歡實  
樂太平之運而涓埃莫效彌慙非據之恩無任悚灼之至  
謹奉表陳謝以聞

爲宰相請不停千秋宴會表

臣等伏見太常卿韋縕奏稱京兆尹韓朝宗面承進止云  
若更不雨卽停千秋節者臣等伏以千秋令節萬壽良辰  
上以答皇天啟聖之休下以展蒼生務農之望禮白帝賽  
田神著在典式久通誠感陛下以經旬不雨憂人軫念有  
阻羣情將停盛節勤恤之旨被物以渙而祈報之歡於義  
難間況近城郊甸雖以愆陽自餘郡縣頻霑需澤今自東  
京起居使魏方進至臣等親問方進云自陝以東數日一  
雨秋稼滋茂特異常年此則萬庾可期三農無害近郊之  
內雖未霑霈率土之濱已知豐衍太平令典豈可闕如又

數年以來此禮頻廢臣子之地獻壽無因朝野之情多歡  
莫展特希天鑒俯暢人心

陳情表

臣父嘉之幸遇明時早勤學業出身入仕四十餘年歷官  
五政經考二十未能亨通纔及今長臣夙荷嚴訓累登清  
秩頻遷省闈又拜掖垣地近班榮臣則過量途遙日暮父  
乃後時在公府有偷榮之責於私庭無報德之效反慚烏  
鳥徒廁鴛鴦伏望降臣一外官特乞微恩稍霑臣父

應賢良方正科對策

并問

問朕聞理國莫尚乎任賢命官必資乎選眾堯舜以聲而  
以度考覈良難殷周取德兼取言徵求匪易朕所以載懷  
經術之彥々遺其寢虛佞性能之士朝忘其飢子大夫光  
我弓旌應斯揚擇爲政作法豈無前範安人濟時亦有令  
躅宜敘立身之志各言從官之才至如七輔八元施何綱  
紀十臣四老正何得失並陳事迹兼詳名氏夫朝會古禮  
登享舊章九儀式辨其賜六贊各明所執雍時起自何年  
毫社立於何代天士地士此何所封諸布諸嚴彼何所主  
又穆邦家而濟生死三聖之教何長利動植而益黎元五

材之用何要工商兩業在俗何先文武二柄適時何急凡此數科不獲雙美必去者方於去食可存者同夫存信朕將親覽爾等明言

對伏惟陛下文明有赫元聖廣運勸激極乎宇宙察微窮乎物象至如選眾任能之術禮經享物之要三聖五材之短長文武工商之用捨斯並獨斷聖慮懸衡睿謀百辟端委而雍若庶績不言而潛運矣猶以爲立政圖大試言務重弗躬弗親庶人不信降清問於穹昊儼神威於咫尺斯亦堯咨舜吁同德比義臣愚敢不拜手稽首對敷天子之

休命制策曰子大夫光我弓旌應斯揚擇爲政作法豈無  
前範安人濟時亦有令躅空敘立身之志各言從官之才  
者臣聞邦有道貧且賤焉恥也今神化陰隲要道光被設  
序塾以教於鄉立膠庠以訓於國制爲祿秩以勸其從則  
含生稟靈者孰不刻意於仁義飭躬於聞達所謂堯舜之  
代比屋可封也臣以一介能行無取思勉進以追羣顧觀  
光而知愧嘗亦自强不息有聞而行馳顏閑之極摯伏周  
孔之軌躅學古庶乎叶道慎行期乎潤身非有志於干祿  
苟求仁於寡過立身之志允或在茲從官之才則愚豈敢

何則仲尼有言曰如有所譽其有所試必也臨事難乎預謀昔孔明之自比管樂時人未許仲由因之以師旅夫子哂之祗奉睿問懼深隕越其敢覬冒輕議天工陛下若不棄管蒯無遺蘊藻考片言而察所以効一官而視所由安敢度哉取則不遠知人則哲陛下允迪於聖君揚已自媒微臣敢辭於醜行制策曰七輔八元施何綱紀十臣四老正何得失並陳事迹兼詳名氏者書曰惟后非賢不乂惟賢非后不食故君明臣忠予違汝弼時聞間出代有其人昔者黃帝之首出庶物也時則有若七輔股肱舟楫虞舜

之賓于四門也時則有若八元忠肅恭懿周文之心德同濟始用十臣漢儲之羽翼已成初聞四老陳其事迹斯亦庶乎詳其名氏固可量也七輔則風牧共貫八元乃伯仲同歸語十臣之倫則太顛闇天稽四老之類則綺季園公昔鄰子之敘古臣勞於傾蓋魯公之間儒行疲於更僕況實繁有眾急景不留聊舉凡以見意豈遽數而周物制策曰夫朝會古禮祭享舊章九儀式辨其賜六贊各明所執雍時起自何年毫社立於何代天士地士此何所封諸布諸嚴彼何所主者傳曰朝有定制會有喪儀書曰享多儀

儀不及物曰不享斯蓋曲爲之防事爲之制經禮三百儀  
禮三千載在祀典藏之史籍九儀謂一命受職再命受服  
三命受位四命受器五命賜則六命賜官七命賜國八命  
作牧九命作伯六贊謂孤執皮幣卿執羔大夫執鴈士執  
雉庶人執鷩工商執雞雍時起於秦年毫社立於周代天  
士地士者漢武之寵方士將軍始受其封諸布諸嚴者班  
史之記小祠先儒不詳所出制策曰穆邦家而濟生死三  
聖之教何長利動植而益黎元五材之用何要工商兩業  
在俗何先文武二柄適時何急者夫人生而靜天之性也

感物而動情之欲也天稟其性而不能節聖人能爲之節  
而不能絕故務恬樸貴清淨同術於湯之益謙合志於堯  
之克讓此道教所長也若乃不殺伐證因果包太空以爲  
言化羣有而歸寂此釋教所長也皆能懲窒嗜慾靜鎮紛  
糅王侯得之以貞天下至於辨貴賤立君臣示之以好惡  
因之以誅賞使禮樂刑政燦然可觀則爲善不同其味相  
反係風捕影蕩而無適故知孔氏之立教乃爲邦之所急  
也傳曰天生五材廢一不可斷之於陰陽效之於氣物示  
休咎以垂誠因興衰以運行若可廢則乾坤之道其或息

矣然土爰稼穡居中履正應我皇之休運弼大化以阜成  
利動植而益黎元先金火而踰水木必不得已斯其一隅  
又國有六職實載工商時之二柄莫先文武同唯阿之相  
去何是非之足徵然舜命共工之職周有考工之記車服  
器械斯焉取斯豈與夫乘時射利滯財居逐者若茲之瑣  
瑣焉文德者政之所專也武威者文之所助也然則士農  
之末作巧賢於鬻貨昇平之歲經國先於定功臣學昧稽  
古思迷政途謀適不用空愧繞朝之策道之將行猶委仲  
尼之命謹對

對讀書判

甲讀周書陰符或告違法

所習有業著在前典不讀非聖聞諸昔賢甲知敬學之爲先遂發憤而忘食既而下帷之時不學明訓張燈之際乃習陰符徒成仲舒之淫不如元凱之癖或稱違法誠則伊咎欲將議獄其或有詞至於太公傳符蘇秦佩六國之印黃石受記張良珥七葉之貂苟如斯失無寘於辟

對除喪鼓琴判

乙旣除喪而鼓琴成聲或告忘哀云不敢過

三年之喪寧戚則易百行之最惟孝爲先乙縗絰旣除櫩  
棘餘毀旣而綠琴在御朱絃高張搏拊成聲愉樂斯在雖  
子張臨喪和之而和先王制禮不敢不至與其樂也何其  
速哉

欽定全唐文卷三百十二目錄

孫逖

五

宰相及百官定昆明池旬宴序

湖中宴王使君序

趙六宅浴後宴序

送李郎中赴京序

送李侍御之芳默中掌選序

送張補闕歸鄴序

送蔣胄曹充隴右營田判官序

送裴參軍充大稅使序

送遂州紀參軍序

送康若虛赴任金鄉序

禹廟別韋士曹序

吏部尚書壁記

鴻臚少卿壁記

伯樂川記

唐齊州刺史裴公德政頌

唐故幽州都督河北節度使燕國文貞張公遺愛

頌  
并序

故滕王府諮議杜公神道碑

欽定全唐文卷三百十二

孫逖五

宰相及百官定昆明池旬宴序

古者天子居青陽服蒼玉於是乎和令布德行慶施惠其義遠矣粵若稽古皇帝御天下之十有九載溥暢神化宏宣大明氏菴來享四方無事元凱升朝百揆時序年屢豐而多慶物由庚而自樂乃賜羣臣十日宴所以畢春氣樂太平也越三日己巳會於定昆明池於是秉鈞宗公執事庶尹元袞赤舄黼衣繡裳奉璋峩峩佩玉鏘鏘仰丹闕而

拜命俯清川而樂飲大庖孔碩尹京爲致餼之司旨酒思  
柔柱史爲佐樽之政旣錫之以高會又悅之以備樂修妓  
羅舞名倡間歌含姑洗於鐘鼓動陽春於羽籥陟則設帝  
降則具舟榜文鷁以泝洄與飛鷗而狎玩鯈鰐甫甫鳴鶩  
翼翼薰風敷散於草木喜氣宛延於郊甸亦旣醉止于胥  
樂兮夫恩之所覃者深則感之所及者遠引之於大足以  
助天地之同和伸之於微足以致魚鱉之咸若大君垂裕  
豈虛也哉詩以展事抑惟舊典我上相裴公中書令蕭公  
保乂皇極緝熙文教以爲正國風美王化者莫近於詩微

言浸遠大義將缺乃命革刻浮靡導揚雅頌斲雕爲樸取  
實棄華親題首章以倡在位皇矣上帝式歌文王之德穆  
如清風方聞吉甫之頌請問其目列之於左

湖中宴王使君序

書曰寇賊姦宄又曰奪攘矯虔延於平人干國之紀常州  
刺史王公奉若天命肅清江服德之至也不言而默信今  
之行也不言而知懼政未朞月路不拾遺斯亦隨武子鄭  
太叔常從事於茲矣歲三月使車行郡輕舟入湖自公及  
私寓物成趣水照金章春明朱綬倚禹穴於前棹迴越城

於後屏南國春暮鶯花亂飛東山晝晴林嶺皆出載酒公  
讌尋幽水嬉班秩以節在宴樂而有禮簪笏斯皇覺雲湖  
之增價夫皇華乘傳朝寄之重邱壑林藪幽趣之適在此  
行也兼而有之請賡載歌用旌厥美

趙六宅浴後宴序

昔孔門達者言志於夫子曰浴乎沂風乎舞雩咏而歸豈  
非遊必有方道在則樂貴潔清以象德輔精爽而成趣吾  
友趙子亦事斯語矣歷選暇日咨謀同心備預芳華有事  
沃盥炎火電烟洞房燠若搜湯以申誠闕一字水知其善清

以流其惡則形之汾滌苦而利於病則神之藥石雖雅琴  
養德惠風折醒曾何喻哉未足多也振衣而退繼酒爲樂  
需食有節誦言無譁所貴酣暢以和湫底夫始於澡身終  
於養神樂只君子曷嘗違仁左衛騎曹張晉明伸紙染毫  
俾予題序

送李郎中赴京序

今上有天下之十載鑿輶在鄆而大夫師長庶士御事分  
曹成周俾贊居守歲八月詔下東都召水部員外郎李公  
拜工部郎中崇德也李公主善秉哲敏才慮行深光能明

冥樞自達始以茂才擢第與今中書舍人許公俱補廣陵  
掾相與沿達淮泗嘯訶雲物雅頌允鑠東南有光官匪慢  
而趣成道不行而樂在自時厥後蓋四三年或翰飛禁垣  
或鷹騰仙闕接武軒陞迭耀冠劍夫豈求之歟皆溫良恭  
儉讓以得之也所謂謙受益德必聞崑崙琅玕南國橘柚  
無遠不居彼何言哉傳置具車候亭出餞西顥沉陽北陰  
肅殺風落嶠澗霜飛河潰金羈載馳紫亭何遠夫居四民  
時地利周所以貴冬官草奏議應列宿漢所以寵郎署之人  
也之德也必能簡孚乃職克休厥聲天秩虛求明庭仄

席矣凡今作者賦詩贈行

送李侍御之芳黔中掌選序

高陽氏之才子侍御其人焉夏之文求也藝兼而有之矣頃者持斧河朔獨按專城明罰勅法所向風靡是以有黔中之往俾修河朔之政不然者何萬里而南爲至如遐荒靡莫之俗置吏羈縻之道則眾賓敘之矣倦談者何得而稱焉

送張補闕歸鄴序

余射策於洛城南門者有年數矣補闕張子嘗同彙征逮

揮翰於禁庭又聯官於近侍人各有舊所貴於同聲吾愛  
其才敢忘於久要承明厭直河朔言歸且鄴惟舊都漳有  
深涉昔聞七子今在一門北州爲營當有聚星之會西垣  
贈別請陳零雨之詩

送蔣胄曹充隴右營田判官序

古之使臣必有命介所以謀闕計事類能換功蔣侯之往  
佐輜軒蓋其義也夫其敏行精識長才博聞克荷詩禮之  
訓聿修清白之業故妙年從官已著老成之風卑飛未騁  
共許垂天之翼是行也必能使田有封洫事著典常儲峙

孔殷甲兵不頓愛人許國何以尚茲時中丞公亢寵天朝  
而子勤役邊鄙豈不以策名委質者義方之大訓出入顧  
復者常情之小慈不貴垂堂之說還嗤倚門之望懿乎哉  
又聞君子之遠其子也河隴先秋鷹隼方擊贊成糾慝今  
也其時羣公題之賦詩以贈

送裴參軍充大稅使序

古之王者稅公田虞衡之入給郊廟賜與之用無有遠邇  
咸率乃職越會稽郡者海之西鎮國之東門都會蕃育膏  
肆兼倍故女有餘布而農有餘粟以方志之所宜供天府

之博斂篚絲綺縉金刀浮江達河命爲汎舟之役撰功底  
績實賴飲冰之使是行也裴子爲政焉迺命水工具行器  
節制費用詳度川陸指洞庭以北上向長安而西矣談笑  
之外厥有成功樽俎之間見其從事展使能者非子而誰  
而疇昔交情今茲吏道歎淪落於荒服結殷勤於官次喬  
木之國子其歸乎篁竹之鄉余何爲者肝膽楚越始合終  
離嗚呼歧路素絲得其幾矣十月冬旱三江晝晴夢故園  
之黃落見長河之鴻鴈澤國山水天資助人炎方草樹歲  
寒未入居者愛客行者徇公拜神禹之清祠泛伍員之濤

水車馬疊跡傾越人於外郊樓船接艤溢吳歌於寒浦贈君以不拜戒君以登陟攬涕河道賦詩詠曰

送遂州紀參軍序

遂州參軍紀公吾友雲將之今弟也敏於行志於道克修人彝允副兄勗噫周公之允紀爲其首天祚明德必將有後不然何棣華之可久也選曹舉善羣吏須才九霄始構一命而偃穆卜吉日遄征畏途緬躋岷峨遐涉褒漢宿息巖險凌臨湍悍仗信不慄載義必亨方慕忠臣之志固無垂堂之責爾之寡兄克施有政是則是效念茲在茲福利

則覲心永隔遠嫌則荒言自絕固雖邛僰之產巴蜀之饒不潤脂膏誰謗薏苡懋厥不德時維哲人羣公贈言要僕題序

送康若虛赴任金鄉序

昔太史公涉汶泗登鄒嶧以觀孔氏之遺風康子之吏於是邦有以見古人之心矣況大君出豫將事升中之禮有司擇人俾佐奉高之邑利在求舊急於使能位卑才難亦可宗也夫強學者義之用工文者藝之本明識者智之府令名者德之興子曰疑士四德以待百事如農之既勤若

射之有志行無越思往無不利彼遊刃於理劇固恢恢乎  
有餘地矣初余以朋友之故謫居荒服憔悴湘濱縉雲不  
調明時殆將十載是舉也所謂理舊汙續常職信有國之  
令典知若人之晚成五月鳴蜩載驅翹翹贈之維何折彼  
柔條餞之維何席彼秀蔓炎雲在天景風拂野時燠方熾  
吾子勉之請各賦詩以無忘平生之好

禹廟別韋士曹序

世稱命祠者禹廟之謂矣初少康以一旅之眾復禹之績  
祀夏配天不失舊物立祠制位茲其始也炳靈不測潛德

有孚東南風土固不祇若故自斑白至於童幼駿奔走執  
籩豆相望道路歲無虛日郡掾韋公諸侯之良也揜才慮  
行秉秀騰實清明在躬造次於是夫率人以斂邦賦之重  
簡才備行郡事之急揆功底績者非韋公而誰詩曰鴻鴈  
于飛哀鳴嗷嗷維此哲人謂我劬勞韋公有焉練日明發  
沐芳祠宇邀祝史以陳言宴朋徒而寵行川澤紓餘棼棟  
轍輶天與澄霽神助幽陰萬象皆清百籟非俗蓄洞澤以  
東匯亘連岡而南指嵐氣沈沈陽景不入神光爛爛陰堂  
自明吁其駭人也韋公乃挹瓊芳酌元酒倚余棹兮中洲

君不行兮夷猶今洞庭兮無波使江水兮安流要言旣招  
神具斯醉宴樂愷悌初自明而達幽景福興作終出無而  
入有祭典不黷王事其勤飾羈絏之徒旅想京闕之雲物  
東園有洛西河惟雍歷金門觀象闕則知聲明之盛也登  
鄴杜躋嶠函則知形勝之美也詩人所以適樂國君子所  
以操土風及君此行二者備矣則偃僂下土鬱湮外邦者  
尚有何言哉凡我同人賦詩贈別云

吏部尚書壁記

吏部尚書在周爲太宰之職其建設徒屬敷陳事典則周

官備之矣秦滅古法始置尚書漢增其制創立選部故靈  
帝以梁鵠爲選部尚書是矣魏改選部尚書爲吏部尚書  
自晉宋至於北齊皆因之宇文朝依周官置大冢宰卿一  
人蓋其任也隋革周制復曰吏部尚書皇朝龍朔二年改  
爲司列太常伯咸亨元年復爲吏部光宅元年改爲天官  
尚書神龍元年又爲吏部尚書綜九流之要爲六官之長  
位尊任重實在於茲自武德已來多以宰相兼領一彼一  
此更爲出入才難不其然乎皇帝在位之二十二年缺其  
官選於眾乃命武都公自兵部尚書拜焉公地惟宗英才

則人傑忠孝自律矜嚴成憲式是軌度諒惟衡石國之利也所及遠哉天監有唐俾多吉士踐此位者四十八人嘉名已著於國史故事宜存於臺閣繫以日月自得春秋之義記其代遷更是公卿之表以備官學列爲壁記焉

鴻臚少卿壁記

鴻臚漢官掌蠻夷歸義者致其饔餼辨其等威在周爲大行人在秦爲典客在漢爲鴻臚其屬有譯官及郡邸丞長洎後魏太和中九寺各置少卿兩員掌副卿事亦由傳稱亞卿書載三少制位或差於伯仲受任同歸於師長成務

贊禮擇賢而居卽其義也帝唐亮采立政稽古命官柔服遠人綏厥有眾肅慎來賀渠搜卽敘示之以干羽通之以冠帶允諧是職豈易其人非夫野王之政理元成之經術德儒之明識元方之令望則曷由臻茲蘭陵蕭公朝之俊德觸邪秉憲人之雅重草議爲郎入掌王言出膺方牧帝咨惟允公實來斯且有皇華之命適表兼人之美乃求舊官守敷陳代遷明授任之有章示名器之無假自嗣聖已後記於壁焉

伯樂川記

太原元帥黃門侍郎李公國之宗盟朝之俊德以元凱之忠肅兼桓文之節制戊辰歲秋七月公以疆場之事會幽州長史李公於伯樂川王命也公駕四牡鏘八鸞旆旌悠悠車輜嘽嘽乙未出於北京戊戌次於橫野己亥至於會封人戒備軍吏宿設立會表於高阜闢轅門於大荒漁陽精銳太原材力駟介八百徒兵三千戈如林羽若月少長有禮賓主不悖蚩尤劙其五兵若教懸其六卒洸洸乎信可以憚穹廬而震高闕也於是地主致餼以昭饗宴之禮君子有儀以訓上下之則歌蔓草之相遇笑投壺之失辭

大庖既盈醻清有蕡胥樂周於卒乘屬厭及於輿臺慈惠之德於是乎在夫幽州太原襟帶之地自河以北幽州制之自河以東太原制之在兩軍之交當二境之上厥有棄地皆爲曠林守之則表裏之勢全舍之則候望之路隔公料以古今度其川原獻方略而入觀於王議工徒而東爲此會爰究爰度匪遊匪追蓐食無再舍之勤扞掘爲一夕之衛不愆於素返旆而旋君子謂此會也能用典矣初公之始至太原也酌於人賦於事以爲節用者國之善政於是乎減戍卒以寬其征修備者武之善經於是乎致秋集

以哀其旅足食者人之所庇於是乎賞屯兵以艾其力近利者奸之所生於是乎禁和糴以懲其弊然後序山澤之險廣亭燧之虞候騎出於長城爟火通於大漠畫田定賦講射訓騞蓄信義爲國寶修德行爲戰器行之一年軍乃有節邊鄙不聳冀黃之教也雖魏絳有和戎之利卻縠有敦詩之德申伯之式是南邦韓侯之奄受北國曷云比議未足量力公之與幽州李公也義均伯仲芳若蘭茝周諸侯以異姓爲後晉大夫以同官爲寮入亞六卿共行司馬之法出膺九命俱受元戎之律詩曰維其有之是以似之

其二公之謂矣不書所會將何述焉揚厥美於萬斯年俾  
夫來世知二公相見在此川也

唐齊州刺史裴公德政頌

昔太公之理齊也尊賢知尚有功泱泱大風千載不泯石  
慶古之良相也臨淄社焉于公古之良吏曹也東海祠焉  
裴公今之良太守也濟北頌焉今古一揆謂之齊志苟非  
其人名不僞立君子是以知裴公之爲政有異能矣初公  
以甲子歲秋八月蒞於是邦祗遹明命宏敷令典教之誨  
之養之育之俾夫闔境之內靡清風漸膏雨醉純德飽詬

言若卜筮之是孚如草木之允殖用克畏慕升于大猷其  
明年也皇帝東巡狩至岱宗自洛及兗於皇時邁雷轂萬  
乘雲旗千里供帳於東道者凡十有六州焉大或數折次  
或萬井中產者輕幣膏梁者倍征方事之殷猶懼不給茲  
郡褊小實難圖也公淵然淡識卓然遠謀擇利而行慮善  
以動西自於陽穀東盡於長清造舟爲三橋置騎爲萬驛  
闢野爲兩頃除道爲九達或總或結或薪或槱或饔或餼  
或糧或糗爨之踏踏積之栗栗其崇如墉其比如櫛皆先  
之以方略繼之以生聚因吏祿之奇贏雜官用之餘羨通

變合度豐省中程編戶之民秋毫勿與繇是邑無征令鄉無斂法賈不利於乘急農不傷於甚賤且狎其野而安其業人所謂勤而不得疑作德施而弗費雖小必濟不亦宜乎抑又聞之居簡則易於德綏處煩則難於柔克大抵皆是其誰不然公始自知供迨於卒業不鞭一卒不貫一吏繩責勿用鐫噍無施禮以生其恭悅以盡其力役不再令事無後期雖子文治兵之舉叔敖城沂之政類能比德曷足稱多洎鑾輿反旆旌別淑慝監頓使劉日政勸農使盧怡並奏公理行第一議者以爲當矣其三年秋大水河堤壞

決諸郡有聞皆俟詔到莫敢興役害旣滋甚功無已時公以爲執事諉上者非至公之法也便文自營者非盡忠之計也亦旣成奏因而發卒播告厥指率籲於人荷鋤者襯屬負畚者磨至從公于邁祁祁如雲公俯臨決河躬自護作雨不張蓋塵不振衣饋不致鮮寢不處館蔬食以同其烹餚野次以同其燥溼板築競勸礪鼓弗勝克鞏而成匪亟而速以浹辰之役興百倍之利澹災革弊人到於今賴焉古之所謂敏則有功豈虛言矣公之方在河上也有執訊者傳詔命公爲宣州刺史公悼其功之不成且懼入之

休怠未卽宣布周之密之公撫巡如初飭厲不輟及提役  
旣畢國人皆賀公於是解印出次啟籥見書莫不瞿然而  
駭曰不虞公去之速也嗚呼曷歸乎乃大哭旣而幢棨就  
國干旗首途野有輶耕巷無服馬男女以辨號泣相望或  
觴於郊或餞於境扶服遮道汎瀾駐車莫肯旋歸殆過信  
宿夫所居人富所去見思前史以爲有德君子之遺風猗  
嗟裴公蓋有之矣公名耀卿字煥之河東聞喜人祖某皇  
朝亳州鄼縣令父守真皇朝成寧二州刺史贈晉州刺史  
又贈兗州都督皆受祉必大垂裕不朽彰微簡冊布昭政

聞其緒業有如此者公之昆友故冀州刺史子餘等六人俱以儒行達天下之人謂之六龍公之自出今屯田員外郎韋述等七人俱以才名進天下之人謂之七子其族姻有如此者公覃訏有聲髫弁克類公侯表於龜筮詩禮成於小學八歲神童擢第則已殊於公路矣弁髦之後尤邃於文長安中則天首命有司考試調集之士而第其詞之高下公以甲科授祕書省正字異其對也睿宗之在藩邸精選寮屬公爲典籤兼掌文翰愛其才也其文藝有如此者頃之遷國子主簿試詹事府丞歷河南府士曹參軍拜

考功員外郎除右司兵部二郎中自長安令臨此郡自宣  
城守改授冀州翁歸爲政不移於故跡延壽理人亟登於  
高第入拜戶部侍郎今爲左庶子其閥閱有如此者若乃  
邁德由已全誠自衷出入孝悌周旋禮樂幅利以儉葆光  
以和仁而有剛直而不倨微妙析理入於無間清明開物  
周於有象享茲具美可謂大賢其庇身也宏矣其所憑也  
厚矣詩曰布政優優百祿是遵又曰君子萬年介爾景福  
夫如是欲辭福祿其可得乎方當彌綸帝績豈徒潤色吏  
事而已盧縣父老某乙等懷公之惠不可弭忘思欲銘德

頌美計功稱伐以予國之史臣也學於春秋褒貶之義乃  
因邑子校書郎衛憑假詞不能徵拙於我事則詳實言多  
遺恨著循吏之傳願守文翁述馬野之詩慙非史克詞曰  
瞻彼濟矣湜湜其沚有斐君子令聞不已帝省其方和鑒  
央央務穢布常駿惠于王我隄旣溢我民旣恤成之不日  
有始有卒黃髮番番飲公之和矢詩不多維以遂歌

唐故幽州都督河北節度使燕國文貞張公遺愛

頌并序

有唐開府儀同三司行尚書左丞贈太師燕國文貞公諱

說字道濟張氏聖文神武皇帝佐命之臣也開元六祀宅  
於幽朔及公旣歿御撰豐碑以爲用公於是邦當革弊之  
舉訖彼故老徵於前事有以見聖人之情見於辭矣夫渤海  
碣之北有山戎焉乍臣乍驕或息或縱鎮之以大府府有  
都督威之以大軍軍有節度二者之任萬邦之屏彌縫其  
闕必有宗臣曩者天冊之初王尚書不反命則我天后以  
納言狄公領之先天之際孫將軍不振旅則我睿宗以太  
尉宋公爲之洎陘口之役薛公小劙後數稔傷痍未平易  
置諸將少有稱者則我皇帝注意於文貞公社稷之固生

民之傑伊昔徇節未嘗顧身面折二豎辯邪正於君側首謀四凶決安危於天下勇於義力於忠雖有責育不能奪已自受命處此聲振殊俗終公之代不敢近邊聖人金城其在是矣先是公之未至也軍實耗斃邊儲匱少帑藏乏中人之產革車無百駟之羣將欲豐之不其難也公問以謠俗因而化之命什人採銅於黃山使興鼓鑄之利命杼人斬木於燕岳使通林麓之財命圉人市駿於兩蕃使頒質馬之政命廩人搜粟於塞下使循平糴之法物有其官官贍其事如川之至以莫不增一年而財用肅給二年而

蓄聚饒羨軍聲武備百倍於往時矣猶以爲不一勞者不久逸不暫費者不永寧旣庶且富人可用也於是塹山澤起亭障塞雞鳴之阨守阜陵之衝遮大夏之路距盧龍之口延袤千里橫絕一方以順天地之心且爲華夷之限命令之日修塞之後人到於今賴焉夫戎狄遠却暴禁矣貨食滋至財豐矣封守以固人安矣師徒不勞兵戢矣武有七德我其四焉坐致必勝之道以銷未形之患是公之深計遠慮所致也初公之大用實以詞宗雖亟持國鈞而未執兵柄及台揆中廢荆衡外牧上將復內用因以爲將惟

幽都克慎厥始惟大原克和厥中惟朔方克成厥終三駕而時靡有爭繇是復踐中樞之任矣文武爲憲斯之謂歟喬嶽告成遂登仲虺之相金華念舊仍遵尚父之師高朗令終固其宜也昔周有張仲是稱孝友漢有留侯覘推籌畫太守飛聲於朔野司空邁績於西晉及公之貴世德其昌光於祖考則慶州都督刑部尚書追孝於前烈友于兄弟則國子祭酒懷州刺史致美於當代施於祚允則兵部侍郎駙馬都尉纘戎於後葉人臣尊寵舉集其門豈伊朱輪之盛方繼緇衣之好辯其譜系范陽之大族也敘其封

略燕國之名都也徵其政理幽州之良牧也美數多矣斯人之德與夫班伯之榮故郡買臣之驚守邸蓋不侔矣蔚縣父老某乙等感之所以致久而益思遠訴不才追書盛德徽音已隔空悲梁木之歌碑頌獨存應墮峴山之淚仍係辭曰

聖出賢覩爲師爲輔大國宗文殊方畏武帝謂幽朔人思  
鎮撫受命再瞻聿來茲土謀猷旣壯闢漏咸補守固邦寧  
財豐人聚四牡旣駕三邊無侮又何與之元袞及黼范陽  
宗邑燕垂守宇德被塞翁恩深召父琢彼遺愛傳於終古

貞石不騫薊邱之下

故滕王府諮議杜公神道碑

公諱義寬字某姓杜氏東都濮陽人也其先在周者爲侯在漢者爲三公在魏者以許昌居守在晉者以荊州作鎮則杜氏之世祿厥惟舊哉若乃其澤雷夏其川河濟顓頊起焉昆吾理焉則濮陽風化所憑厚矣不有純嘏孰生大賢公則魏陳留郡守亮之曾孫北齊膠州刺史竟陵縣開國侯保之孫唐宰相世系表作北齊膠州刺史竟陵公仰隋本郡中正仰之子唐宰相世系表作隋鴈門太守保承邁種之遺訓體清醇之上姿童而典

學冠而好古於是東涉汶泗北登鄒嶧講周公之德觀孔氏之藝則易之變詩之風樂之和禮之節書之政春秋之理人一以貫之達其本矣繇是大業九年以孝廉高第授河東郡法曹已而隋氏弗綱王充竊命我太宗文武聖皇帝是以有陝東之師公轉餉如役羸糧從徑軍無後爨士有餘勇鄭是以殞唐是以興帝將策勲公乃辭賞既不獲命請從敘遷因授虞州司倉參軍貞觀二年改授普州安康令稍遷合州治中轉恆州別駕雍州高陵令拜朝散大夫饒州長史遷蘇州司馬兼滕王府諮議凡宰二邑佐六

郡大小必誠遠近如一其所在也使者昇聞其所去也邦人頌德且有兼官之拜實固大宗之屏宦享三壽以諧百工天難忱斯不可贖已春秋七十有二永徽六年某月日終於蘇州某月日乃葬濮陽壘城之舊原禮也噫公之爲人應變當理有慶卿之善畫徵闕考祥有董生之博覽威敵闕附有穰苴之大略摧剛爲柔有季布之高義雖運逢板蕩而才偶經綸而或出當騁奇干賞蹈利託風雲之會邀日月之光則萬戶之封不足致也三旌之位曷云貴也而能卷其舌塞其兌實若虛明若昧不貪驟雨之福以遠

浮焱之害斯大雅之保身亦君子之向晦也洎天衢開泰  
皇運清明從官以養人而不爲祿謹身以報主而不近名  
回翔郡邑三十餘載出處之際優遊自得其古之恬勢利  
者歟初公之裔祖始宅帝邱時更大亂室無遺堵公因謂  
所親曰吾之世業爲郡中正遺愛不泯陰德在人施於子  
孫必有興者于公高門之事可不務乎用是改卜鮮原大  
起層構垣墉旣蔓棟宇斯飛輪焉與焉爰笑爰語及公之  
後斯事果徵一世其昌旣開方國再世而大遂爲相門論  
者以爲知言矣爾其鄉黨之行閨門之德孝乃天繼仁爲

已任烝嘗盡敬宴喜無荒祿剥必凋於外姻譙讓不行於私屬故子弟趨教州里嚮風雖有嚴刑峻法不如公之潛導也詩所謂行歸於周萬人所望有令名矣夫令德矣夫

有四子長曰儉早世次無忝終於朝散大夫梓州鹽亭令

次曰慎行終於益州長史建平縣開國男

唐宰相世系贈  
表作正平侯贈

蜀州刺史次曰惟志終於吏部員外郎贈吏部

闕

咸以大

名克紹前烈豐碑未樹梁木先摧孝孫戶部尚書暹國之

故相也儉德爲輔正身立朝以伯夷之直清兼張仲之孝

友是用祗率理命奉揚祖風作頌稱代刊石表墓留侯大

父已傳班固之書陳氏先生何愧蔡邕之述詞曰

昔公之先於周爲侯及公之允於唐爲輔一德貽孫千齡  
續祖身隔徂謝名存憲矩在漢之陽居河之濱旣旣原隰  
濟濟榛楨別業年深先塋地古豐碑頌德式是東土